

«Lavur voluntaria dat satisfacziun»


Tarcisi Hendry da Sedrun ei in da biars che s'engascha voluntariamein

DA HANS HUONDER / ANR

■ Senza la lavur voluntaria da biars persunas fussen differentas purschidas ed activitads en vischnauncas e marcaus buca pusseivlas. Quei vala ton per la politica, sco per il sport, la cultura e la veta sociala. Ina da quelles persunas che presta bia lavur el zuppa e per gronda part senza indemnizaziun ei Tarcisi Hendry da Sedrun. Per el ein la satisfacziun la renconuschientscha dalla populaziun la pagaglia persuunter. Tgi ch'enconuscha empaet. Tarcisi Hendry (56) sa ch'el ei buc il politicher ni il sportist. El ei igl um dala cultura che s'engascha en favur dil cant e che seprofundeschha ella historia locala. Buca per nuot ei el archivar communal da Tujetsch. Cheu el sutterrana dalla casa communal a Sedrun sesanfla in da ses loghens da lavur e da studi preferi. Sfegliar ed ordinar tut quei che ha da far en ina fuorma ni l'autra cun la historia e la cultura dalla Val Tujetsch ei sia vera predilecziun. L'auter onn sa el festivar il giubileum da 30 onns sco archivar communal. In giubileum che secapescha buca da sesez, essend che quei engaschi succeda dapi l'entschatta parallelmein sper sia lavur sco scolast primar. Denton gest en lezza incarica vesa el l'incumbensa en favur dalla cumimonza: «Tgi che ha las pusseivladads e habilitads da s'engaschar en favur dil cuminetel sin da sectur ni l'auter duess far quei. Tenor miu manegiar ei quei ton sco in'obligaziun. Quella lavur dat cumententscha, ils vischins ein engrazieveli per quei ch'ins fa.» Per Tarcisi Hendry fuorma la cultura ina part dala veta: «Ina societad senza cultura ha ni ragischs ni avegnir. Per mei ei ella qualitat da viver.» El constatescha che la lavur voluntaria ei derasada feg ella vischnauna da Tujetsch. In problem d'anflar gidontras e gidonters per in arranschament existi buca: «Difficultads havein nus pli e pli - sco en biars auters loghens era - d'animar la glieud da surprender responsabladad. En quei grau daventa la situaziun adina pli difficulta.»

Archiv sveglia igl interest

L'activitad sco archivar communal, ch'ei indemnisa cun ina mudesta pagaglia, ensiara bein tuttas premissas e cundizioni per seprofundar ella historia e la cultura. Cheu ei igl interessent dil curriu e passau vid la fontauna. Ei dependa denton era tgei ch'el fa ordlunder. Tarcisi Hendry ha capiu sco paucs auters d'ex-



Cheu ei Tarcisi Hendry egl element da siu temps liber: La lavur egl archiv communal da Tujetsch.

FOTO: H. HUONDER

tender l'activitad digl archivar communal e da dar novs impuls all'impartonza dalla historia e cultura locala. Persuunter ei igl archiv communal da Tujetsch perderga. Quel cuntegn numnadamein buca mo ils documents officials dala vischnauna che ston vegnir archivai, mobein era differentas autres spartas. Ina da quellas pertucca la cultura. Documents personals da persunas trapassadas entochen a scartitas che pertuccan en ina fuorma ni l'autra la vallada, ei ualti beintut d'anflar egl archiv. Aschia ha el instraudau la stad targada la rimnada da documents davart la pietad populara. Maletgts, cartas da sogns e devoziunalias ein vegni ensemble. In' exposizion el museum dueci esser il resultat final da quella lavur. In'autra aczjuni pertucca brevs veglias da persunas tuatschinas emigradas pli baul en autres tiaras. Era cheu ei la collecziun gia gronda. «La finamira da quella lavur ei d'edir in mument in cudisch cun quelles brevs. Ellas cuntegnan feg interessantas informaziuns», di Tarcisi Hendry. Denter 150 e 200 uras da lavur impundau el annualmein en favur digl archiv.

Vidlunder vegn igl engaschi sco inspectur cantunal dils archivs per il district dalla Surselva che cumpeglia treis entochen tschun dis per onn. Quella funcziun ademplescha el medemamein dapi 20 onns.

Confundatur dil forum cultural

Sco voluntari ei Tarcisi Hendry denton era s'engaschaus ella pleiv, ha dirigu duront 20 onns il Chor-baschgia Sedrun e duront siat onns il Chor mischedau Sedrun. Dapresent diregia el il Chor mischedau Rueras e contu el Chor mischedau Surrein (Sumvitg). El ei staus confundatur e dirigent dils «Resuns dil Rein» e ha cantau diesch onns culs Cantins. El ha restaurau in fuorn da paun a Surrein ed ina caltgera en Val Nalps ed ha collaborau el club da skis. Tarcisi Hendry ei responsabels per las paginas d'internet dalla scola e dalla pleiv. Dapi diesch onns impunda el ina buna part das sias forzas en favur dil forum cultural. Da quel ei el staus coniniziант e dapi la fundaziun appartegn el alla suprastonza. Ensemble cun ils collegas da quel ein diffe-

rentas activitads vegnidias sviluppadas ed organisadas cun success. Il product il pli novissim da Tarcisi Hendry en qui conex ei la pagina d'internet pil scribent *Vic Hendry*. Dapi enzacons dis ei quella consontschiba sur www.thendry.ch. Ella cuntegn ina massa informaziuns davart il Tuatschin che viva dapi rodung 50 onns a Schaffusa. La homepage persuna da Tarcisi Hendry dat dil reminent la pusseivladad da prender access en outras parts che pertuccan la historia e la cultura locala, mo era en lavurs personalas. La pagina ed ils documents leutier ein ina gronda ed exemplarica lavur en favur dalla cultura. Ella muossa denton era la varietad e la rihezia da quella: «Ei dat paucas vischnauncas che han aschi bunas descripcziuns dils davos tschentanders sco Tujetsch. Jeu patratgel en emprema lingua vid l'ovra da pader Baseli Berther e vid quella da pader Placi a Spescha che nus vegnii ad edir proximamein.» Il fiug per la lavur da Tarcisi Hendry lai supponer ch'el stetti aunc ditig fideiveis agl engaschi voluntari ed aschia en favur dil cuminetel. In exempl per auters.